


ETHOONYERYO YA MESIYA

 Nrowe nuuramihe muru okathi vakhani. Muluku Oophentiwa, naaiwaka nsipo nlo, “Yesu ori vakhiviru, nto itthu sothene sinniweryaneya,” eyo ennihakalaliha mirima sahu osuwela wira eyo ti yoovikana nsipo. Eyo Ekeekhaii. Nyuwo muri vaava. Pwiya, kinnaamini wira Nyuwo mwaari ottuli weiwe iwe w’etapernakulu naanaano va, nave; mai ule mwaamukhaani onvarenle ttuutthu ule, onaana, vapulani; ni mwammirav’ole omunlelaka oophentiwa awe, oxipiritaali wu, onookhwa. Mwiiwe mavekelo ahu, Pwiya. Aakhala atthu akilanthe mukereja mu nihiku nothene, okhuma iwoora thanu na mosa voosiis’ula. Awo anlipelela owoonani Nyuwo, Pwiya. Awo arooniwa olavula olelo wira Nyuwo muhaahihimuxa alipa-ookhwa. Ni Nyuwo mwa Yesu mmosaru nlelo onkhala ohiy’ula, siviraly’aya miyaakha ekonto emosa ni imiya thanu na xexe. Nyuwo nlelo mwa Yesu. Nto hiyo ninnivekela, Muluku, wira munvonihye khula mutthu onwereiwa ori Ohoolo w’eMuluku. Ahikhale hata mutthu ootteettheya eriyari ahu okathi mutek’ola w’okokhorela ommal’aya. Munooniherye paahi, Pwiya, wira Nyuwo muri vaava.

² Niniwuupuwela axilopwana anli voosiis’ule wa Paasikha, yaari oowoceya. Khivanihovereya, wira anci-ene va ari oowoceya ohiy’ula, oowereiwa ni ahinkhala akumi, mameetiku ahaahiya oohiroromela. Nto okathi yaarow’aya ephiro aya, aahikhala Mmalapo mmosa Yoowo aarwiiye eettaka ni khulavula ni yaawo, khulavula Soolempwa, nihiku nothene. Nto okathi w’ohiyu, Owo aaroihalyaawe mpaani khuwala mukhora, Owo aahiira etthu. Owo iirale siiso ntoko Owo siiralyaawe ahinatthi okhomeliwa vamwiikimanyo, vano awo yaahisuwela wira ole aari Pwiya ohihimunwe. Owo aahilakaseya wiitho waya. Awo yaahitthimaka yaakuvaka, otthika orowa waahimeerya akina, “Owo oohihimuwa mw’alipa-ookhwa.”

³ Muluku, hiyo ninvekela wira Owo arwe eriyari ahu ohiy’ula ni aire itthu Owo siiralyaawe ahinatthi okhomeliwa Wawe vamwiikimanyo. Miyaakha ekonto ni imiya thanu na xexe khasihiyo hat’etthu wa Yoowo; Owo t’Ohimala. Nto anci-ene va ohiy’ula yaakuvele owaani, yaahimeerye amwaar’aya, aiy’aya, ale oophentiwa aya, anamwaattamanani aya, “Owo mukumii! Owo ookikhumelela ohiy’ula! Owo ookivoniha erett’aka! Kinoorowa okhala mukumi vano.” Munivahe yeela, Tithi. Hiyo ninvekela mwa Nsina na Yesu. Amen. (Mukilaathiki.)

⁴ Kileveleliwe orookilala vammilo, masi nkinreereke okhalana muteko kilavulaka, kipatisaka; kaarina kamasi, opacerya wene, okhuma okathi ohokolonw’aka oFlorida ni mukisironi iwe. Kihaana okhuma voosiisu vano, kirowaka oCalifornia, wa

mweeri woophiyaka ntero wa mithukumano. Tivo konvekela Munna Neville vakhala wira aamuwerya olavula nipuro naka ohiy'ula, ni kookupali wira muhiiwa mutthaka wooreerexa. Waahinisivela muteko w'okokhorela wa voosiis'ula wa Munna Neville. Ni ninroromela wira Muluku onoothikela okhala ni yoowo ni ekerej'ela, okathi onikukhul'awe vaava.

⁵ Vano kinoomalaru okumana ni Billy vate vale, nto owo aahikikwannya mpararini, nto owo khwira, "Paapa, atthu arimweemela va, ni akina aya ari vaava nihiku nothene."

⁶ Miyo khwira, "Ahe, kinnitteeliwa murima miteko sahu s'okokhorela sinihalel'aya ophiya okhomoni, wira muhikhale ooweemela." Ni epula enoorupa. Nto okathi ovolonw'aka mpaani, anaithoko anli yaakhuma mukaaroni vate vale, ni ttuutthu mmosa onwereiwa, ni t'onaana. Owo hata khaawenrye ovolowa mmikhora. Masi vekeekhaixa ntoko keemenly'aka va, Muluku oonvonihha ttuutthu uwo, eemenle-ene vate vale. Umhum. Moota Owo onaakhul'awe mavekelo!

⁷ Nto vano vamanly'ahu olaleerya olelo, ni voosiis'ula koolaleya myaha mithanu: *Akhalaka, Akhwaaka, Avithiwaka, Ahihimuwaka, Arwaaka.*

Akhalaka, Owo ookiphenta. Akhwaaka, Owo
 ookoopola.
 Avithiwaka, Owo ooroiha itampi saka
 ottaiwene.
 Ahihimuwaka, Owo ookaliha naxariya
 mahala-ene voohimala.
 Nihiku nlo Owo onimoorwa, oh, nihiku
 noovuwaxa!

Hiyo nri, niwehereryaka ohiy'ula, nilipelelaka okhumelela Wawe.

⁸ Xeeni hiyo okhalenly'ahu oophunyana va? Xeeni atthu orwaaka wiiwa Ehapari yooreera? Enamwi, vowiiyeviha Waya, Eyo ti evarelo murima yuulupalexu olumwenku otonko aya okhalana. Yesu oohimya, "Miyo kathomeliwa, kinimwaaruuha atthu othene wa Miyo." Vano etthu ene ti, etiini ila hiyo enihimy'ahu, ti y'ekeekhai? Eyo ti Ekeekhai? Yakhala Ekeekhai, vano ninoowerya waamini Masu othene Bibilia ohimaly'awe. Yaahikhale Ekeekhai, khivanthuneya okhala nnaata ni yeeyo, nihaana otthikela nirowaka mwa itampi sahu; olya, owurya, wira meelo nikhweeke. Masi kinnixukhuru saana osuwela wira Ela hiyo enlavul'ahu ti Ekeekhai! Ni ela ti etiini emosa paahi mulaponi... Enamwi, ya neexexe mwa nummaru, nnakhala vo ti etiini emosa paahi mulaponi yeeyo Mulipa-oopaceriha owenry'awe okhwa khuhihimuwa, ni okhanle mukumi ohiy'ula.

⁹ Kihooona muxornaaleni, nno muxornaaleni y'opooma nihiku nlo, vaavo awo yaarin'aya mulopwana mmosa, Buda, wira aahihihimuwa. Anci-ene a nyuwo mwaahoona yeeyo

muxornaaleni. Awo yaarina mulopwana mmosa okhanle Buda mukhaani ompaka itthu siiso ntoko Buda siirak'awe; tthiri, owo khaapanke miiriirya, masi mwiixuttiho awe ni itthu sothene saari ntoko Buda. Vakhala wira Buda ookhalana mutthu vapuwani, mmosa oowootha; Muluku ookhalana Eroho Yowarya vapuwani, Eroho y'ekeekhai ya Muluku.

¹⁰ Vano, hiyo noolavula itthu iya sooreerexa, masi enoovara muteko? Yowarya eno . . . Eroho Yowarya enoomulevelela mutthu itampi sawe? Eyo enoovoniha eretta awe? Vekeekhai, Eyo enimwiira. Owo Muluku, voohimala. Vano, nawerya vale . . . Yesu arwa eriyari ahu ni khwiisooniherya Mmansawe, wira Owo mukumii, va ohiy'ula eriyari ahu, yaahaana omwiiriha khula mmosa a hiyo omwaamini khula natiri Owo orin'awe mBibiliani.

¹¹ Ookhala mutthu va ohinatoko okhala mwa hata mmosa wa mithukumano saka khalayi? Nrowe noone matat'anyu, ohinatoko okhala mmithukumanoni khalayi. Nkawehani paahi, voolikana ntoko nuusu na muttitthi!

¹² Miyo nkihiyo mpenuxa. Nkinaamini—nkinaamini wira ookhala mutthu okhanle mpenuxa. Yesu Kristu t'okhanle Mpenuxa.

¹³ Ni Owo oohimya, okathi aary'awe mulaponi mu, wira Muluku t'ari Mpenuxa. Vano, okathi Owo aary'awe mulaponi mu, Owo khaihimya okhala Mpenuxa, masi Owo aawooniha atthu ethoonyeryo Awe ya oMesiya, ni wira ethoonyeryo eyo ya oMesiya waari osuwela isiiri sa mmurimani mwaya. Akavi ansuwela wira eyo ekeekhai?

¹⁴ Okathi Owo aamuhimenry'awe Petru, vaaruuly'awe wa Yoowo, nle naari nsina nawe, nle naari nsina n'atithi awe; Petru aahaamini mwa enamuna emosa, ni waamini wowaatta, mpakha Yesu aahinvaha ihulelo sa Momweneni, ohoolo waya, ni khimukhalaha vasulu va Ekereja.

¹⁵ Okathi Filipe omphwanyaly'awe Natanayeli mukhitte mwa mwiri, khimuleela, "Murwe mmoone Ole omphwanyaly'aka, Yesu a oNasareti, mwaana a Yosefe."

¹⁶ Nto natiini ule oowiivaha khwira, "Wookhala w'okhumelelawa etthu yoooreera oNasareti?"

¹⁷ Owo aamwaakhunle vootepa oreera mutthu ti mutthu aankhaly'awe waakhulaka. Owo iirale, "Murwe moone. Mhuulumeleke paahi. Murwe, nwehe mmansinyu."

¹⁸ Nto Filipe amalakarurwa ni Natanayeli, Yesu khumwiirela, "Ola va mwIsarayeli, mwa yoola kuuvo wootha!"

Owo khwira, "Mukisuwenle liini, Rabbi?"

Owo khwira, "Filipe ahinatthi owiihanani, Miyo kaahiwoonani mukhitte mwa mwiri."

Owo khwira, “Nyuwo mwa Mwaana a Muluku, Mwene a Isarayeli.”

¹⁹ Owo aahimuleela muthiyana vehimeni ele yaari mmurimani mwawe. Itthu iya saahooniherya wira Owo aari Mesiya. Nto vakhala wira Mesiya yoowo oohihimuwa mw'alipa-ookhwa olelo, ni oopaka ettipiheryo, ni oonivoniha iretta sahu ni olevelela itampi sahu, vano etthu emosa paahi Owo aakhanly'awe wiiraka waari otthikela wooniherya ethoonyeryo emosaru yeeyo, wira Owo nlelo mukumi wira amukhalihe khula natiri Owo omuhimaly'awe, ooreera. Eyo ekeekhai? Nrowe naamini yeeyo vano okathi onvekel'ahu.

²⁰ Pwiya, atthu anoolipelela. Nuulumo nimosa ninkhuma wa Nyuwo nnookhala noovikana Munna Neville wala miyo naakhanly'ahu ohimyaka mwa ikumi sinci-ene. Nuulumo nimosa paahi. Vano, nookhala nuusu na muthukuman'ola ahinatoko wona mithukumano khalayi. Pwiya Muluku, Mpattuxa a Wirimu ni vathi, nvelelihe Owerya wa Yesu Kristu mpaani mu, Ole ohihimunwe, Eroho Yowarya jaarwiye oPentekositeni, ni wira Eyo yaattikitthele atthu. Wira miyo kiwerye, hata mwa olala nno vammilo, kiivahererye voomalelaxa Eroho Awe, wira Eyo ewerye olavula mwa nsu nla noomalalama kimmuvahaaka Yoowo, awehe mwa maitho ala kimmuvahaaka Yoowo, wira ooniherye sowoona ni itthu saarowa owiiriha atthu wona wira Owo oohihimuwa mw'alipa-ookhwa. Nto okathi atthu ala anoon'aya yeeyo, vooiriyanani wothene emukhupaarele khula natiri Owo omuhimaly'awe. Vakhala wira awo arootheka, awo emukhupaarele Yoowo wira eleveleliwe. Awo yakhalana eretta, esuwele wira makhwatta Awe t'anivoninhe. Munivahe, Pwiya. Hiyo ninvekela mwa Nsina na Yesu. Amen.

²¹ Vano ti elikanyiheryo yuulupale. Va, ohoolo w'atthu imiya piili wala tthaaru, ti yookhweya. Mweemela-ru ohoolo wa ikonto imiya thanu, emilyawu nuusu, itthu sene seiyo sinniiraneya. Owo Mulukuu. Vano akavi mu anwereiwa ni antthuna ovekeleliwa, nvenxe matata. Moone, oophiyaka nuusu a nyuwo, wala oovikana. Nkikhanle waaruuha othene aya osulu nno. Kinoona wira... Kihaana omukoha-tho Billy. (Omukoha sinto ookawa ittikitti sa mavekelo. Vano, owo—owo ohiira?) [Ookhala mutthu oniira, “Ayo.”—Mol.] Vaareera. Vaareera.

²² Ettiminku evinre ahiiso emaara yookiserya kaary'aka vaava, khisaakaiwe ittikitti sa mavekelo, nto kirookoha paahi, “Atthu akavi va ahinatoko okhala vamuthukumanoni khalayi?” Anci-ene yaahivenxa matat'aya, wira khanatoko okhala vamuthukumanoni. Yeemenle-ene ni matata osulu, Eroho Yowarya khukelela ohoolo, yaahimeeryaka wira yaari aani ni iye saakhanle iretta saya, ni etthu yaakhumelenle; ni khwaavoniha atthu voomalela, mpakha miyuuwe ni itthu

olakaseya, mpakha operasawu ohiiriwa. Akavi yaari vaava wira yoone yeeyo isumana vakhani paahi sivinre?

²³ Vakhala wira ookawa ittikitti sa mavekelo, nto nnimwiihana. Eyo enniwiiriha athu oowaani, n'ale oohikhala oowaani; athu atonko okhala vamuthukumanoni, athu ahinatoko; wira ekele muliinyani mwa mavekelo. Khaninwerya waaruuha othene aya osulu nno vaara vamosa. Nnimwaaruuha voomaaleleya ntoko sinwery'ahu.

²⁴ Nto kintthuna mukhale a exariya ni Muluku. Mukhale a exariya mmansinyu. Nto Yesu Kristu arwa eriyari ahu khupaka ni kwiira siiso ntoko Owo siiralyaawe okathi Owo aary'awe mulaponi mu, eettaka oKalileya, muhaana omukupali Yoowo wa etthu p'itthu mumphavel'anyu. Khivantthuneya okhala vasulu va vaplataforma. Owo onweha waamini. Anookhala athu kamosa-kamosa va anwereiwa voowiriyani iwo, ahirina hata ettikitti ya mavekelo, anrowa ovonihiwa khula enamuna. Akavi anwereiwa nave ahirina ettikitti ya mavekelo? Nvenxe matata. Ahe, khasikhanle ittikitti sa mavekelo sinci-ene sikaiwe nto, moone. Vaareera, mwaamini paahi. Nwehe nno paahi.

²⁵ Mukihiye kiwooniheni etthu Yesu iiraly'awe okathi Owo aary'awe mulaponi mu. Aahikhala muthiyana mmosa, emaara emosa, aarwiye wa Yoowo. Nto owo khaawerya okela moophunyanani. Owo khaarina hata ettikitti ya mavekelo, masi aahikwannya mukerekhere mwa nlaya Nawe, maana aahihimya mmurimani mwawe, "Koosuwela wira Mulopwan'ole onihimya Ekeekhaii. Kawerya-ru okwannya nlaya Nawe, kinoovonihiwa." Vano owo aahikwannya nlaya Nawe, khukhuma vamuthukumanoni alakela waari muulupale ovikana ola imaara sinci-ene.

Yesu khurukunuwa, khwira, "T'ani okikwannyale?"

²⁶ Petru hata ahimpwapwela, khwira, "Xeeni Nyuwo okohaka etthu ntoko eyo, athu othene ephavelaka wookwannyani Nyuwo?"

Owo khwira, "Masi Miyo kinnoona wira koottettheya."

²⁷ Soowoona sinniruuha otteettheya. Khamunwerya wira, okelaxa mwa seiyo. Nto Owo khwira, khuwehaweha voowiriyani mpakha Owo omphwanya muthiyana ene, khimuhimeerya wira aahikhalana omwareya ephome, nto waamini wawe waahinvonihia.

²⁸ Akavi ansuwela yeeyo? Bibilia ohimye wira, "Yesu Kristu olelo ti Namukuttho Muulupale onwerya okwannyiwa ni owereya wa iretta sahu." Eyo ekeekhaii? Ahe, vakhala wira Owo aari Namukuttho Muulupale, onwerya okwannyiwa ni owereya wa iretta sahu, Owo khaarowa wira ntoko siiralyaawe okathi ule, vakhala wira Owo mmosaru nsana, olelo, ni mahiku othene?

²⁹ Vano nyuwo muhirina ettikitti ya mavekelo, nwehe epantt'ila nno, nto muhimye mmurimani mwanyu, "Pwiya, kinnaamini ni murim'aka wothene, ni kinniwaaminini wira Nyuwo munoorowa okivoniha. Nto mukihiye kikwannye nlaya Nawe. Ni Nyuwo mulavule mwa Munna Branham mmuhimeerye, siiso ntoko Nyuwo saamwiirenly'anyu muthiyana, ni miyo kinoowaaminini." Munookhala a exariya, ni omwaamini Muluku ni murim'anyu wothene?

³⁰ Billy Paul oohimya, oohimya minuutu vakhani sivinre, eemenle va, wira moothukumanya yoovaha wira kivahiwe. Nkaatthuna wira ela yiirane. Eyo yaari. . . Masi, kookukhuru, wa inamuna sothene. Kinniphavela naanaano mmukwahani mwaka w'oCalifornia. Kinoohelala mwa Ehapari yooreera.

³¹ Soovahiwa iyo vakhani munikivah'anyu, moosuwela eniireya ni seiyo? Kaahirowa oPorto Rico ni oJamaica isumana vakhani sivinre, weiwo awo yaalepaly'aya atthu oorukunxa murima ikonto miloko mixexe muhina mwa ohiyu mithanu na mixexe. Exeeni yiirale siiso? Sanamuloko sanyu. Okathi okhumaly'aka mukhulupale a e...mphuki a vakisironi aahivenya, owo khwira, "Nookhalana anamalaleya ehapari anrwa nno ankuxa soovahiwa suulupale, ni ankhalama musurukhu munci-ene. Masi," khwira, "okathi Munna Branham orwii'awe, owo khovekenle hata esentavo ya musurukhu, khonivekenle wira nilive ekontha awe ya wooteeli. Ni owo t'olinve ettikitti awe ya mukwaha, orwa n'utthika." Exeeni yiirihale? Musurukhu anyu. Kintthuna kikupali wira koorumeela oratteene. Tivo, Woolamuliwani, okathi onrow'aka okhala ohoolo wanyu nyuwo ni Muluku, orin'aka ovaha ikontha mwaha wa yoowo, kiire kiirale-ene oratteene. Miyo kihivaherya mmamsaka, kaaweryaka-ru orowa, wira ele yooreerexa kinwery'aka wa ovuwa Wawe.

³² Vano khanikhanle oruuhaka ittikitti sothene sa mavekelo vaara vamosa, tivo kinrowa waaruuhaka, vakhani paahi khula ekwaha.

³³ Ti pani orina ettikitti ya mavekelo nummaru noopacerya? Nvenxe ntata mwaaweryaka weemela. Iwe epantte y'ottuli, muhano mmosa a nikhuli. Murwe vaava va, muhano. Nvire murwe nno epantte ya plataforma. Vano t'ani orina ettikitti ya mavekelo nummaru na nenli? Mwaaweryaka weemela, nvenxe ntata, ettikitti ya mavekelo nummaru na nenli. Muhano mmosa mukunya nno. Vaareera, muhano, nvenye muntthare muhan'ola vasulu va, vasulu vaava. Vano Mwaaroihe *iwe*, Doc, emalaka-ru osariwa ela va.

³⁴ Ettikitti ya mavekelo nummaru na neeraru, nvenxe ntata nanyu mwawerya vale. Mwenye ola vaava va, mulopwana. Nummanru na neexexe, munoowerya ovenxa ntata nanyu. Vaareera, muhano, vaava va. Nummanru na neethanu,

munoowerya ovenxa ntata nanyu. Mwammirav'ola va. Mpakha va, khula mmosa a awo t'ohaasuwela wa miyo. Nummaru na neethanu na mosa, munoowerya ovenxa ntata nanyu, nummaru na neethanu na mosa. Kihiiitthana nummaru na neethanu, nummaru na neethanu? Ni nummaru na neethanu na mosa, t'ohimusuwela wa miyo. Nummaru na neethanu na piili, munoowerya ovenxa ntata nanyu? Nvenxe ntata, ole orina nummaru naneethanu na piili. Vaareera, kookupali wira kinnimusuwela mutth'uwo. Ko—kookupali wira kinnimusuwela. Nummaru na nethanu neeraru, nvenxe ntata mwawerya vale. Muhano mmosa va. Vaareera, nummaru na neethanu na xexe. Vaareera, muhano. Nummaru na namuloko. Vaareera, nummaru na namuloko, muhan'owo.

³⁵ Yookhala evonyeiye nipuro nlo. Nummaru xeeni mulopwan'ola va? Mutthu awehe, mmosa wa nyuwo ookhaliherya arwe oone. [Mutthu mmosa oniira, "Owo ti miloko mithanu na miraru ni xexe."—Mol.] Miloko mithanu na miraru ni xexe. Naari nummaru na namuloko kaihan'aka nto, kooxukhuru, nummaru na namuloko. Masi ninimoophiyeryani khula enamuna. Vaareera. Nkawehani, koosuwela nummaru nanyu vano. Ti miloko mithanu na miraru ni xexe, kahi siiso, muhimmye miloko mithanu na miraru ni xexe wala etthu siiso? Vaareera, nyuwo mulipelele paahi vaavo. Mwaamini paahi. Kinimooleelani, mwaahirumeele ettikitti iyo, ettikitti ya mavekelo, nwehe nno ni mmwaamini Muluku, moone sinto Muluku onoowaakhulelani mavekelo. Vaareera.

³⁶ Nummaru, nlo naari na namuloko? Muloko ni mmosa. Vaareera, muloko ni piili. Vano, mwaahiweryeke ovenya, paahi... Nummaru muloko ni piili. Muloko ni tthaaru, nummaru muloko ni tthaaru, ottuli iwo. Muloko ni xexe, nummaru muloko ni xexe, ottuli iwo. Nummaru muloko ni thanu.

³⁷ Iyo sinookaiwa khula nipuro. Aximiravo ankawa seiyo, aniira paahi, "T'ani antthuna ettikitti ya mavekelo? Nvenxe matata." Awo anookuxa khutakanxasa sothene, khaavo onsuwela ti pani onkuxa evi. Nto awo ankawasa siiso paahi.

³⁸ Nummaru muloko ni xexe. Nummaru muloko ni thanu, t'ani orina ettikitti ya mavekelo muloko ni thanu, nummaru muloko ni thanu? Nummaru muloko ni thanu na mosa, iwo epante y'ottuli. Nummaru muloko ni thanu na piili. Vano, nummaru muloko ni thanu na mosa aakhanle-ene mpaani wala weemela munvireloni, mwiire murwaaka paahi. Nummaru... Mukilevelele, nkonne ntata nanyu, munna muthiyana, vaavo. Nyuwo mwa muloko ni thanu na mosa? Vaareera... [Munna muthiyana oniira, "Muloko ni thanu na piili."—Mol.] Muloko ni thanu na piili. Muloko ni thanu na tthaaru, muloko ni thanu na xexe, nummaru muloko ni thanu na xexe. Miloko miili, nummaru miloko miili, mulopwan'ola nno. Vaareera. Vaareera.

³⁹ Vano kookupali wira ninoophiya mpakha munvireloni mu vano, tivo ninrowa . . . [Mutthu mmosa oniira, “Yoophiyerya.”—Mol.] Mwinre sayi? [“Yoophiyerya.”] Yoophiyerya mwa vano. Vaareera. Ahe, nwehe nno ni mwaamini. Vaareera.

Nrowe noone, vakhala wira napiyaano, voomaleleya ni vakhani-vakhani, *Waamini Paahi*, voomaleleya saana paahi.

⁴⁰ Atthu anci-ene munvireloni va t’ohisuweliwa wa miyo. Nkinoosuwelani. Vano aakhala kamosa-kamosa mu nlelo arina ittikitti sa mavekelo, akina alakela kharina ittikitti sa mavekelo. Khino ninoowerya owiihana akina-tho muliinyani mwa mavekelo muhina mwa minuutu vakhani paahi, nimalakaru wookolela saana evirelo ela.

⁴¹ Kookupali wira mwenye ole va, Doc, aarwa akhumaka ottuli iwe, owo orimwiihaniwa, muloko ni thanu na mosa wala muloko- . . . muloko ni thanu na mosa. Vaareera, murwe vale mukhale vopuroni vanyu, mulopwana.

⁴² Vano, vakhala wira khamwiihaniwe, khencala hata vakhani, moone, nwehe paahi ni mwaamini.

⁴³ [Mutthu mmosa oniira, “Nlelo ennihala *muloko ni thanu na mosa*, nave.”—Mol.] Nummaru muloko ni thanu na mosa ninnihaleela. Khino mutth’uwo khonwerya weemela. Mwaahiweryeke weemela . . . Mutthu awehe ettikitti ya mavekelo ya mutthu mukina, alakela owo t’ottiyana maaru khonwerya wiiwa. Yaary’ene vaava, muloko ni thanu, mukhaleke vopuroni vanyu muliinyani. Vakhala wira arookhuma ni anoothika muhina mwa minuutu vakhani, mwaahela muliinyani nimalakaru wiihaniwa nummaru naya.

⁴⁴ Naarowaka ovira muliinyani va, nmimwiihana sikina-tho, vakhala wira Eroho Yowarya khenkhala ntoko okhala ettikitthelaka empa, atthu, wira evonihiwe.

⁴⁵ Vano, vano okathi woothanla, vano p’ukathi wo wona kaahimye-ene Ekeekhai wala wootha. Vano p’ukathi Yesu Kristu onooniheriw’awe sinto oohihimuwa mw’alipa-ookhwa, wala khohihimunwe mw’alipa-ookhwa. Vano p’ukathi sinto Owo mmosaru nsana, olelo, ni mahiku othene, wala Owo kahiyo mmosaru nsana, olelo, ni mahiku othene. Vano Owo ohaana wooniherya okhala Mpenuxa, wala Owo kahiyo Mpenuxa. Nto akhala mutthu aarowa otthuna okuxa opuro aka, wira aavekelele aretta, pooti orwa akuxe opuro aka.

⁴⁶ Akavi a nyuwo muliinyani mwa mavekelo va, nwehaka va, muri muliinyani mwa mavekelo vano, ahinkisuwela, ni munsuwela wira miyo nkinoosuwelani wala hat’etthu ya nyuwo, nvenxe matata.

⁴⁷ Vamuthukumanoni vo, ansuwela wira nkinsuwela hat’etthu ya nyuwo, nvenxe ntata (nyuwo munwereiwa) vamuthukumanoni vo. Moone, eyo vo.

48 Vano exeeni Muluku onrow'awe wira? Yookhala Yolempwa, Eroho ya Muluku eri vaava, vano enoovara muteko? Kaweryaru wiiwahererya wa Eroho Yowarya, enoovara muteko. Ni khenrowa ovara muteko wa miyo voohikhala wira nyuwo munimwiiwahererya wa Eoroho Yowarya, "Maana miteko sinciene sa ikuru Yesu khaawerya wira elapo Awe Yoowo, mwaha w'ohaamini waya."

49 Vano mwaamini ni murim'anyu wothene, mukhale oottittimiha saana ntoko sinwery'anyu. Mukhale oomaala, nwehe. Eroho Yowarya yaira etthu, vano mutthape, nto mwaamini.

50 Vano, Pwiya, sothene sirin'ahu, sothene nikhanly'ahu. . . Awo aheemela mpakha metto saya sinnuuma, aakilaathi mpakha anihalel'aya ohileya. Vano, Pwiya, muhiye esuweliwe wira Nyuwo mwa Mulukuu. Ni kihiihana muthukuman'ola vamosa, mwaha w'okiruma Wanyu. Ni keemenle va, kahi wira kooniwe, wala kahi weererya okhala kiiraka vaalupale wala opaka etthu yoovirikana, masi mwaha wo wira owo muteko kivahiw'aka ni Nlaikha, ni woolipiheriwa ni Masu Anyu. Muhiye esuweliwe ohiy'ula wira Nyuwo mwa Yesu Kristu, Mwaana a Muluku, ohihimunwe mw'alipa-ookhwa; ni wira Nyuwo munkhala muKereja mw'Anyu, mw'atthu Anyu, wira mpake ni mukelelihe ohoolo muteko mmosaru Nyuwo mwaarin'anyu okathi Nyuwo waary'anyu muumu mw'erutthuni y'ethayi. Munivahe, Pwiya. Nto hiyo nnimoottopelani Nyuwo, mwa Nsina na Yesu Kristu. Amen.

51 Vano ori yayi Billy Paul, ori mpaani muumu? Owo oorowa? Wala, mutthu arwe va akuxe ittikitta iya sa mavekelo, moone. Murwe, Munna. . . ? . . . Muthiyana ookhalana ettikitti ya mavekelo mmatatani mwawe. Munvahe owo paahi, moone.

Mukhale oottittimiha saana vano.

52 Vano muhan'ola va, ntoko sinsuwel'aka, mmalapo voomalela wa miyo. Nto va eri elatarato yoolikana ya Yolempwa, atthu anli ni ilapo piili soovirikana.

53 Yesu aahirwa veehimeni emaara emosa, mwa Yohani Oowaarya 4, nto aahimphwanya muthiyana mmosa a oSamariya. Nto Owo aahilavula ni yoowo okathi vakhani, mpakha Owo ophwanya ole waari mulattu awe. Nto Owo aahimuhimeerya mulattu awe. Nto, Owo vairaly'awe, ole aahisuwela wira aari Mesiya. Akavi ansuwela yeeyo? Munnuupuwela ovaanela waya? Owo iirale, "Muthiyana, mukiruhele maasi." Exeeni Owo iir'awe? Aathokosa erooho awe.

54 Nto owo khwira, "Ehimye ti yoowiixa, ni Nyuwo khamurina etthu y'orika-no. Kahiyo elimalelo wa Nyuwo, muYuta, waavekela aSamariya yeeyo."

55 Owo khwira, "Masi mwaamusuwenle Ole nyuwo munlavulan'anyu, mwaamukivekela Miyo maasi."

56 Nto siiso ovaanela iwo waahikelela ohoolo mpakha Owo osuwela ole waakhanle mulattu awe. Akavi ansuwela ole waari mulattu awe? Owo aakhala m'oraruwani. Tivo Owo khwira, "Rowani mwawiihane aiy'anyu murwe vaava."

Owo khwira, "Miyo nkirina aiy'aka."

57 Khwira, "Eyo ekeekhaii. Mwaahikhalana athanu, nto ole munkhalan'anyu vano kahiyo iy'anyu."

58 Vano nwiriyane etthu owo aahimaly'awe. Owo iirale, "Pwiya, kinoona wira Nyuwo mwa Profeta. Hiyo noosuwela wira Mesiya arwa vale Owo onoonihimeerya itthu iya. Mesiya, ethoonyeryo ya Mesiya, Owo onimwiira yeela Owo arwa vale; okhala wira Owo aari Muluku-Profeta, Profeta, Moise aamuhimaly'awe." Khwira, "Hiyo noosuwela wira Mesiya onimwiira yeela Owo arwa vale, masi Nyuwo mw'Ani?"

Owo khwira, "Ti Miyo kinlavula ni nyuwo."

59 Vano owo aahitthimaka arowaka mmuttettheni khwaahimeerya atthu, "Murwe, mmoone Mulopwana mmosa Yoowo okihimenrye itthu siiraly'aka. Kahi yoola Mesiya ene?"

60 Nto va ori muthiyana mmosa a wEtiyopia ohoolo wa mulopwana mmosa Anklo-Saksoni, emaara yoopacerya okumana aakhalaru; ele eniihan'ahu muthiyana ooriipa, mulopwana mukunya. Okathi yaakhumelenly'aya yookoha eyo wu, moovalaanani, ohoolo wa Yesu, Owo aahaahimeerya naanaanoru: khiivo evirikanelo mwa makhuli aatthu. Hiyo othene nikhumme mwiri mmosa, Atamu ni Hawa. Vekeekhai. Ilapo saakhal'ahu-mo, ti sirukunxale nikhuli nahu; khiyaarina naata n'oyo. Muluku aakhwenle atthu othene: mutthu mukunya, mutthu ooriipa, mutthu a ncano, mutthu ookhwila, mutthu ooxeerya, ni othene. Othene t'opattuxiwa a Muluku.

61 Masi muhan'owo eemenle va mwaha w'etthu. Khino owo mulipa-oowaamini, khino khahiyo. Khino owo natampii. Siiso owo okhanle-ene oowaarya. Siiso ory'ene muretta, siiso ahikhanle. Pooti atthunaka; mulattu wa musurukhu. Pooti eemenle-ene mwaha wa mutthu mukina. Miyo nkisuwenle. Miyo nkinatoko omoona, ni nkinuupuwelela hata vakhani mwaha wa zeeni okhalenly'awe va. Ni muhan'owo onnisuwela eyo. Eyo ekeekhaii, muhano? [Munna muthiyana oniira, "Ayo, mulopwana."—Mol.] Eyo yaari ekeekhaii, nvenxe ntata wira atthu ewerye wona. Nvenxe ntata paahi wira atthu. . . Nvenxe ntata paahi. Nno okumana wahu woopacerya. Vano vakhala wira Pwiya Yesu ono. . .

62 Owo akhala muretta, nkaarowa owerya onvonihani ovikana kaarow'aka owerya woovonihani. Masi vakhala—vakhala wira Yesu ori vaava Owo khaakhanle onvonihaka okhala wira Owo ohiira okathi Owo okhwiw'awe oKalvario. Masi Owo onoowerya wira etthu wira ooniherye wira Owo nlelo ti Yesu mmosaru, ni wira ola aamwaamini, aanvonihani. Nto

okathi ene yoowo aarow'awe ovonihiwa, nyuwo mwanvonihiwa, nave, mwaamini-ru. Eyo ekeekhai? Vano, Apwiya enivahe. Kinwehererya muttikithelo wa Eroho Yowarya, vekeekhai.

⁶³ Nto vano, mwa Nsina na Yesu Kristu, kinnihela khula erooho mu vathi va weettiherya waka, wa ovuwa wa Muluku.

⁶⁴ Vano, muhano, kintthuna paahi mukiwehe okathi vakhani paahi. Kintthuna wira mwaamini ni murim'anyu wothene. Ni nkinuupuwelela etthu xeeni mukhalenly'anyu va, nyuwo mw'ani, hat'etthu. Masi Muluku onnisuwela sothene sa nyuwo. Masi Muluku akihimeerya-ru etthu mukhalenly'anyu va, nto munimwaamini wira Yesu Kristu, Mwaana a Muluku, ori vaava wira apake ni aire ntoko Owo siiraly'awe okathi Owo aary'awe mulaponi muumu?

⁶⁵ Muthukumano onimwaamini, ni mwiiwanano mmosa?

⁶⁶ Vano hiyo nri va, yookhumelela yookhalihwi. Hiyo oowanli noovexa matat'ahu, hiyo na mmalapo mmosa ni mukhw'awe. Eroho Yowarya emulempe Bibilia, ehimmye wira itthu iya saamukhumelela nihiku nla, wira Yesu aahihihimuwa mw'alipaookhwa ni itthu iya saamukhumelela, muteko Awe waamukelela ohoolo, ni mahiku ala ookiserya yaarowa okhala voolikanexa ntoko Owo aahimaly'awe wira yaamukhala. Vano ti siiso?

⁶⁷ Muhano, okhala wira orimuukhuwa, vekeekhai, owo onttikittha matat'awe okhala wira onisoono vootikiniha okathi ula. Kahi mwaha wo wira eemenle ni miyo; miyo ka munn'awe, nkaarowa omukhalihwi owoona siiso. Masi owo t'o—t'osuwela wira yookhala etthu eniiraneya. Nto nyuwo munnoona elataro ele vale ni Waarya iwe vasulu vava, munna? Ti yeeyo eniwoonihani siiso. Nle Nlaikha n'Apwiya, Nlo nri vasulu vanyu naanaano va. Nto nyuwo muri va wira miyo koovekeleleni, [Munna oniira, "Ayo."—Mol.] mwaha w'owereiwa muthana munihaw'anyu ni yoowo. ["Ti yeeyo."] Ti yeeyo, nvenxe ntata.

⁶⁸ Vano munnaamini? Moone, onnisuweliha, isiiri sa mmurimani. Siiso ntoko Owo saahimalyaawe, "Mookhalana axiia athanu."

⁶⁹ Nyuwo muniira miyo. . . vano, anamurwa naanaano, nyuwo pooti wira, "Munna Branham orimwaanyiherya eyo."

⁷⁰ Nrowe noone sinto Nlo nrimwaanyiherya. Kookupali wira Nlo nihimmye wira mwaawereiwa muthana. Yaari siiso? [Munna muthiyana oniira, "Ayo."—Mol.] Yaari ekeekhai? ["Ayo, mulopwana!"] Nto nyuwo, mwaahikhalana operasawu, nave, ni munoomalaru okhuma oxipiritaali. Ni, wira musuwele wira ka murumeyi a Muluku, aiy'anyu akilanthé ottuli iwe. ["Ayo, mulopwana, eyo ekeekhai."] N'awo aakhalana mukattyamiho, nave. Kawerya vale woohimeeryani mulattu wa aiy'anyu, munimwaamini? ["Ayo, mulopwana."] Awo arina mukattyamiho mpararini mwaya ni muthana aya. Eyo ekeekhai? Nvenxe ntata. Kinimoolelani etthu ekina. Kinnimoona mmiravo

mmosa, mwan'inyu, okilanthe ottuli iwe, nave. ["Ti yeeyo."] Vaareera. Nto mwan'inyu ookhalana inamuna kamosa-kamosa s'okwanyuwa. ["Ayo, mulopwana."] Ti yeeyo. ["Ayo, ti yeeyo. Kooxukhuru, Yesu."] Muhano Stovall ti nsina nanyu. Nlo ti nsina nanyu, Muhano Stovall. ["Ayo."] Rowakani owaani, Yesu Kristu ohaakhula mavekelo anyu! Munoowerya waakhela etthu nvekenly'anyu, mwa Nsina na Yesu.

⁷¹ Vano mwaamini paahi! Nyuwo atthu othene mukhanle ooriipa, mwaamini ni murim'anyu wothene vano. Munnisuwela wira Yesu Kristu, Mwaana a Muluku, oohihimuwa mw'alipa-ookhwa? Eyo Eroho Awe enookhalihani oowoona siiso.

⁷² Vano ori muthiyana mmosa mukunya. Miyo nkinimusuwela, nkinimuupuwelela wira ti pani, etthu okhanly'awe, wala—wala etthu mukhalenly'anyu va. Yakhala ekeekhai, nvenxe ntata. Vano munnaamini? Vakhala wira Muluku onoo, onoowerya wuupulula murim'awe, siiso ntoko Owo siiralyaawe ni muthiyana veehimeni, ntoko Owo omwiireny'awe muthiyana ooriipa, atthu akavi akunya anrowa waamini vakhala wira Owo onimwiira? Va, miyo ni muthiyan'ola, oowanli noovenxa matata, nno okumana wahu woopacerya.

⁷³ Kinihimya etthu emosa, muhan'ola kahiyo a wenno. Mukhumme onkhuma nsuwa, munikhuma onkela nsuwa murwaaka wenno. Ti yeeyo. Munikhuma Ohio, nto epooma ene waari oDayton. Ti yeeyo. Nto etthu mukhalenly'anyu va, mwaha wo wira munootteettheya. Ni mookhalana mukhalelo wo wuukhuwa, okhala wira khamunwerya orupa. Munniwurya muthinto mmosa wa murette mwaha wa yeeyo. Oniihaniwa "Dixie," ti siiso, Mason. Ti yeeyo. Mutthike, munoorowa orupa vano, okhuma ohiy'ula mpakha ohoolo. Yesu Kristu onnoovonihani. Rowakani mwa Nsina n'Apwiya.

⁷⁴ Mwaweryaka waamini! Vano nyuwo vamuthukumanoni vo, muttikithelo wa Eroho Yowarya ory'ene vaava, mwaamini, nyuwo muhirina ittikitti sa mavekelo.

⁷⁵ Ankhi mulopwana mutokweene eemenle va okathi vakhani ovinre, yoowo, ahaawerya okhala. . . ahaawerya okela muliinyani, owo aarina nummaru noovonyeya, aari vayi? Nyuwo, nvenye mweemele. Munnaamini wira Yesu Kristu Mwaana a Muluku? Munnaamini wira ka profeta Awe? [Munn'owo oniira, "Ayo, mulopwana."—Mol.] Vaareera. Munoowereiwa masasu. Eyo ekeekhaii. Ahoohiyani vano, rowakani owaani ni mukhale mukumi! Yesu ohoopakelani nsasu nooreera, moone.

Mukhalane waamini, ni mwaamini. Muluku Mulukuu.

⁷⁶ Ehaali anyu, mulopwana? Munnimwaamini Pwiya Yesu Kristu? [Munn'owo oniira, "Amen."—Mol.]

⁷⁷ Vano, aahikhala mulopwana mmosa aarwiiye wa Yesu emaara emosa, nto owo aaroorowa khoopowa, nto khurora khimuhimeerya mpatthani mukina, khimuruuha. Nto mpatthani

ula . . . Khimuhimeerya wira aari mulipa-oowaamini. Nto owo aahikhala ootikinihiwa vaaiwaly'awe, nto owo khwira, "Nyuwo mukisuwenle liini?"

⁷⁸ Owo khwira, "Filipe ahinatthi owiihanani, okathi waaryanyu mukhitte mwa mwiri, Miyo kaahiwoonani." Eyo yaari imiilya miloko miraru voorukureya mwaako. Mwentto, naahikuxa nihiku nimosa wira atthikele eliinya ya mavekelo, nto varwiiy'awe muliinyani mwa mavekelo.

⁷⁹ Munnaamini wira Yesu onniwerya okileela ole okhanle mukattyamiho anyu? [Munn'owo oniira, "Ayo, mulopwana."—Mol.] Mwaamwaamini ni murim'anyu wothene? ["Ayo, mulopwana."] Muthukumano waamwaamini ni murima wothene? Kahiyo mwaha wa yoowo mwaneene okhalenly'awe va. Mwaha wa mutthu mukina; nto owo muthiyana, nto owo orina eruku ya okhwa, owo murokor'inyu. ["Ayo, eyo ekeekhaii."] Kahiyo vekeekhaixa awinyu. . . Ti murokor'inyu nuusu. ["Ti yeeyo."] Ni owo khokhanle vaava. Owo ori oxipiritaali oTennessee. Nyuwo mwa a weiwo. ["Ti yeeyo."] Nto nyuwo mwa . . . Muthiyany'owo aahooperariwa, masi khuwaamureerenle etthu. Nto nyuwo mmweemelenle yoowo. Muluku oovaheni yoovekela anyu. Rowakani, Muluku anvonihe muthiyany'owo ni amukhalihe mukumi, vootthariha waamini wa mulopwan'ola.

⁸⁰ Pwiya Muluku, hiyo ninnimpwapwela xetwani uwo onkuxa ekumi ya muthiyany'owo. Ni wira mutth'ula, okhanle mmusi awe, akhale mukumi okhala wira owo ohoorwa khweemela mwaha wa yoowo. Yesu, Nyuwo mwaahemela oKalvario mwaha wa hiyo, ni Nyuwo moonivoniha. Ni ninniwaaminini Nyuwo. Ekhale siiso. Amen.

Rowakani, mwaamini vano, munna. Muhivela-vele mwaha wa hat'etthu ekina.

⁸¹ Ehaali anyu? Hiyo n'amalapo mmosa ni mukhw'awe. Ela emaar'ahu yoopacerya okumana. (Vano mukhale oottittimiha saana, ni nwiriyane oratteene ni nvekele.) Vakhala wira khaninsuwelana mmosa ni mukhw'awe, ni n'amalapo mmosa ni mukhw'awe, khino emaar'ahu yoopacerya nitonko ahu okumana. [Munna muthiyana oniira, "Ayo."—Mol.] Eyo ekeekhaii? Vakhala wira ela emaaara yoopacerya otonko ahu okumana, nvenxe ntata. Muluku akuupululela-ru ole okhanle mukattyamiho anyu, nto munimwaamini wira ka murumeyi Awe? ["Ayo, kinimwaamini wira mwa yoowo. Nyuwo mwa murumeyi a Kristu."] Kinimooleelani vano. Hiyo khinnatoko okumana khalayi, masi nyuwo mwa muKentucky. Ti yeeyo. Munikhuma nipuro nniihaniwa Somerset, Kentucky. ["Ayo."] Eyo ekeekhaii volikana. Miyo k'a oBurkesville, Kentucky. Ni munihawa ni mukattyamiho mmosa ori mmu—munapwiiipwini, marupo, epantte ya vathi. ["Ayo!"] Awo mapotthe. Ti yeeyo.

Vaareera, Jewel ["Oh!"], mutthikeke, Muluku oovaheni openuwa wanyu. ["Oh!"]

⁸² Munnimwaamini Mwaana a Muluku, Yesu ohihimunwe? [Munna muthiyana omanle ovonihiwa mapotthe, onookhuwela-tho, "Oh!"—Mol.] Mwaaweryaka waakhela! Nyuwo pooti oxanka mwaha wa xeeni muhan'owo onihakalal'awe. Ni nyuwo, mwaamwiira, ["Oh!"] vaakhanle wira mwaari mwa mukhalelo wo okhwa. ["Nttotopeliwe Nsina Nawe!"]

⁸³ Nkinoosuwelani. Masi nkihiyo...Kaahivonye vale, kookupali wira mpatisiwe voosiis'ula, okhala wira kinnoona wira muhiira etthu yooreera. Masi, woosuwelani, nkinoosuwelani. Nyuwo murookela paahi mutankini m'opatisa, nto eyo yaari...owo—owo oopatisiwa. Masi munnaamini wira Yesu onniwerya okuupululela mikattyamiho sanyu? Muthukumano onnaamini yeeyo ni murima wothene? Kinnimoona muthiyana onkhumelela eriyari ya miyo ni nyuwo. Nyuwo mweemenle va mwaha wa muthiyana mmosa, nto muthiyani'owo t'owuuluvalaxa woovikanani nyuwo. Vano, t'ame anyu. Awo khakhanle vaava. Awo t'oGeorgia. Nto awo t'owuukhuwa saana. Mwaha aya, orukunuwa w'ekumi, ohiya wuona mweeri. Ni nyuwo mweemenle mwaha w'ame anyu. Eyo ekeekhaii. Ahe, awo anoopenuwa, ni akhale akumi. Rowakani, mwaaminiki vano, nto yothene enoomala. Mwaahimeerye wira ekhale oominyala.

⁸⁴ Muluku ooreeriheni, mmiravo. Mukhalane waamini. Mwaamini ni murim'anyu wothene. Mwaaweryaka waamini! Nvekele.

⁸⁵ Kinoona wira nyuwo ni miyo n'amalapo. Muluku onnoosuwelani ni Owo onnikisuwela miyo. Masi Muluku aamuwerya okuupululela mukattyamiho anyu? Nto Owo aira vale, nyuwo mwammwaamini Yoowo?

⁸⁶ Atthu akavi mu yaarowa waamini, ni wira, "Muluku, kinimwaamini Nyuwo mwamuhimeerya-ru mulopwan'ole"?

⁸⁷ Okathi vakhani paahi. Muhano okilanthé ottuli w'aximwali ala va, okiwehaka miyo, owo onihaaxeya ni wiipiwa mitika. Nto owo okilanthé vale, anvekelelaka mutthu mukina. Ni erooho awe yoomukwannya Namukuttho Muulupale, nto owo oophitaana ni Muluku. Muninvekelela mpatthan'inyu, orina eretta ya mmuruni. Nto awo ankhalasa e—epooma emosa, epooma emosa ekhaani, ti oCorydon, Indiana. Eyo ekeekhaii. Mwaaweryaka waamini, munimwaakhela evekenly'anyu. Amen.

⁸⁸ Mwaahiwereiwa murima; emalelo anyu eri vakhiviru. Mukihiye kooleleni mmosa wa mixankiho sanyu, ohiya vo, munnaavura asikaro. Nwehererye minuutu mmosa, erooho eyo erootupha okathi ene yoowo. Owo khonthuna wira eyo. Ti yeeyo entannya mulattu anyu. Va, ti mmiravo *ola* okilanthé vaava va, owo onthuna waahiya asikaro, nave. Owo aamini-ru ni

murima wothene, muhapo wa sikaro onookhuma. Mwaaweryaka waamini! Munnaamini? Mwaamini-ru ni wira vasulu va yeeyo, munoowerya waakhela ovuluwa wanyu; ni *nyuwo* munoowerya. Nyuwo khamuhiyo a wenno. Nyuwo mwa a ottaiwene ni wenno, nave. Mutthikele Owensboro vano, mwaattotopelaka Apwiya. Mmwaamini Muluku.

⁸⁹ Kinnoosuwelani, masi nkisuwenle evonyeie ni nyuwo. Apwiya yakuupululela ole okhanle muxankiho anyu, munoowaamini Yaawo? Vano erett'anyu ya napwiipwi enoovona. Vaareera. Rowakani owaani ni mutthapeke, mwaamini ni murim'anyu wothene.

⁹⁰ Nkikupanli wira kinnoosuwelani. Hiyo n'amalapo mmosa ni mukhw'awe? [Munna muthiyana oniira, "Ayo."—Mol.] Munnaamini wira etthu miyo...? Kooleelani vale ekeekhai, munoosuwela wira ekeekhai wala nnari. ["Ayo."] Vaareera, erett'anyu ya murima enimoohiyani. ["Ti yeeyo. Kooxukhuru."] Rowakani owaani mukhale mukumi.

⁹¹ Miyo nkinoosuwelani. [Munna muthiyana oniira, "Nnari."—Mol.] Masi Muluku onnoosuwelani. Munnaamini wira koohimenryeni ole okhanle muxankiho anyu, ni wira waari yayi, mwanvonihwa? Muthana anyu. Rowakani owaani vano, onimoohiyani ni munoorowa okhala mukumi.

⁹² Munuupuwela wira Muluku aamuwerya ovoniha muwe owo ni okhaliha mukumi, ohikhanle operasawu? Munnaamini? Nvenxe matata mwaaminiki vale. Rowakani owaani mwaakhele, mwa Nsina na Pwiya Yesu. Mwaamini.

⁹³ Ti yootikiniha, okathi wiiraly'aka, mwaahikhalana etthu yeeyo. [Munna muthiyana oniira, "Ayo, kinnaamini."—Mol.] Muwe. Mwaahoona etthu yootikiniha okathi ohimaly'aka yeeyo, okhala wira irooho soopiili sirootupha, okathi mmosaru. Rowakani, Yesu Kristu onimoovonihani. Mwaamini.

⁹⁴ Nyuwo mwa mmiravo, wira mwiipe makhonyokhonyo, masi munnaamini wira Yesu onimoovonihani? Mwaaminiki vale, mrowe, mwaaminiki, ni nvonihwe.

⁹⁵ Akavi munaamini ni murima wothene?

⁹⁶ Ankhi kahoohimenryeni nuulumo, masi wooleelani wira Muluku ohoovonihani okathi murukununw'anyu vanloothoni vale ni mwaahoona etthu yootikiniha, mwaamukaamini? Rowakani owaani, moovona. Yesu Kristu onnoovonihani.

⁹⁷ Nyuwo mwa mwali munihaaxeya mwaha wo wuukhuwa. Munnaamini wira Muluku onoovoniha wuukhuwa iwo ni okumiha mwa nyuwo? Munniphavelaka ophwanya nipuro noopacerya-vo. Ela eri vaava va. Rowakani vano, mutthapaka, oohakalala. Yoomala, wa nyuwo. Mwaamini ni murima wothene.

⁹⁸ Murina mukhalelo wo wuukhuwa otannyale eretta ya napwiipwi. [Munna oniira, "Eyo ekeekhai."—Mol.] Nvonihwe

okathi ovenyaly'anyu khweemela ottuli iwe, mulopwana. Mwaha wa yeeyo koolipelel'akani wira nvire va. Rowakani, mwalye yoolya anyu, mukhale mukumi.

⁹⁹ Eretta ya muthiyana, wuukhuleya, ooxanka. Ti yeeyo. Enoorowa woohiyani vano. Rowakani owaani mukhale mukumi, mwa Nsina na Pwiya Yesu. Mwaamini paahi.

¹⁰⁰ Murina mukattyamiho wa muthiyana, ti yeeyo, ontannya evuvelo. Nlo niphwanya nittiyeye. Mwaamini, Yesu Kristu onimoovonihani. Rowakani owaani, ni mwaamini ni murima wothene.

¹⁰¹ Vano, murina mukhalelo woorika, ori vamurimani vanyu, etthukweyelo. Munnaamini wira Yesu Kristu onnoovonihani? [Munna muthiyana oniira, "Ayo."—Mol.] Mwaaminiki vale, rowakani mwa Nsina n'Apwiya, ni mukhale mukumi. Mmwaamini Muluku.

¹⁰² Vaareera, munna, munnaamini wira Yesu Kristu onnoovonihani, nave? Murowe muttharaka muliinyani, mwaattotopelaka Apwiya paahi.

¹⁰³ Akavi iwo vano animwaamini Pwiya Yesu? Owo onnisuwela khula...

¹⁰⁴ Muhano Nash, kinnoosuwelani, kahi vootthuna waka Waarya iwo okhanly'aya vasulu vanyu. Kinnoosuwelani, masi muninkelelela mutthu mukina. Mwanamwane mwaamukhaani, mwaana mwaamukhaani, ohinkhala wenno. Owo onkhala oTennessee. Nave-tho, muninkelelela mpatthan'inyu meetiku oninwerya murima. [Munna muthiyana oniira, "O Muluku!"—Mol.] Ni amwaar'awe anoomalaru oyeheya ephome mottooporeni vakhani. ["O Muluku!"] Ti yeeyo. Mwaamini, munoowerya okhala mukumi.

¹⁰⁵ Mwamuthiyana mmosa okilante wookiseryani w'ekhukulu vo, ohenle ekatha vayanoni, munuupuwela-ni, mwamuthiyana? Mwaahikhalana elosowelo. Munimoova okhalana ekina. Ti yeeyo. Yaari ekeekhai, nvenxe ntata, mukukutthaka maitthoni mmaithoni mwanyu. Muhoove, nto khamunrowa okhalana.

¹⁰⁶ Muhan'owo okilante vakhiviru ni nyuwo vo, murina mafuwa, eretta ya iphumu. Muhiye onvura sikaro, enimoohiyani.

¹⁰⁷ Mmwaamini Muluku. Mwaamini ni murima wothene. Mwaaweryaka waamini, sothene sinniweryaneya!

¹⁰⁸ Va ori muhano mmosa okilante ottuli wa muhan'ola va. Kookupali wira mwa...Muhan'owo, okathi vakhani paahi, nsina nawe ti Muhano Evans. Owo t'oKentucky, Louisville. Ti yeeyo. Nkinoosuwelani. Moosuwela wira eyo ekeekhai. Murina eretta ya murima, annoowereyani maaru anyu. Ti yeeyo. Yaari ekeekhai, nvenxe ntata. Mutthikele oLouisville, Yesu Kristu onnoovonihani.

¹⁰⁹ Kinnitharimula waamini wanyu, mwa Nsina na Yesu Kristu, wira mwaamini. Mutthu ti mutthu mu, mwaamini ni murima wothene! Ottuli iwe saana, mweemenle ottuli iwo, mwaamini. Khivanthuneya okhala nipuro khata. Epantte *yeela* wenzo, mwaamini! Akavi ottuli iwo antthuna ovonihiwa? Nvenxe matata, mwiire, “Kinnaamini, Pwiya.” Mwaamini!

¹¹⁰ Mukilante ottuli epantt’*ila* nno, kinnimoona mulopwana mmosa onvekela vaxariya, mwa yoowoona, eemenle vale, owo mulaleyi, owo eemenle vakhiviru va pulpitu, ni onlaleya wira yincerereye. . . onvekela wuncereriwa orumeyi awe. Miyo nkinatoko omoona kookhalaru. Masi ti yeeyo envekelel’anyu, munna. Munoorowa okhalana naanaano va. Mmwaamini Pwiya Yesu!

¹¹¹ Ookhala mulopwana mmosa okilante ottuli wawe iwe, orina etthu evonyeiye ni moonoo awe, iphutu vamononi vawe. Owo nave-tho. . . Mwaamini-ru vale, mulopwana, munoowerya waakhela ovona wanyu. Amen.

¹¹² Wenzo *nno* wookiseryani wa eliinya ela nno, ole anenli, mwamuthiyana mmosa uuramme, vaavale vale orowaka ottuli, okilante vale avekelaka, orina eretta ya wamwe. Ti yeeyo, muhano, nyuwo nvenxale ntata, ni kinnoosuvelani nyuwo—nyuwo mwaari ule aavekela. Muhaakhela ovona wanyu okathi ene yoole.

¹¹³ Ankhi yeeyo, munnaamini wira Yesu oohihinuwa mw’alipa-oohkwa? Owo ori vaava vano? Munnimwaamini Yoowo? Nto nyuwo mwakaamini-ru miyo, vakhala wira koohimenryeni Ekeekhai ya Bibilia, ni Muluku voowaakhula oolipiherya wira koohimenryeni Ekeekhai, eyo enihimya wira, voolikana wira, Pwiya Yesu ori vaava. Eyo ekeekhai?

¹¹⁴ Vano mwiire ela, mwiire ela, muhivoverye, mumpweherye matat’anyu mutthu okilante vakhiviru ni nyuwo. Kinoovekela okhuma wenzo, nto nyuwo nikhuru nothene munoovonihiwa naanaano va mwaamini-ru. Munimwaamini? Mwiixatheryane matata mmosa ni mukhw’awe, nto. Othene munaamini wira munoorowa ovonihiwa naanaano, mwiire, “Amen.” [Muthukumano oniira, “Amen!”—Mol.] Vano nyuwo. . . Kinrowa wira nivekelo nla. Nyuwo nvekele nenlo, nvekeleke numala miyo.

¹¹⁵ [Muthukumano onthhikela nivekelo nla, numala Munna Branham—Mol.] O Pwiya, Mpattuxa a wirimu ni vathi, Mwaneene Ekumi ehinimala, Namavaha a yoovaha yothene yooreera, kookhalana yoothuna, Pwiya, owerya Wanyu w’ovoniha. Nto kinvekela wira Nyuwo mukivahe waamini wira kikupali. Owo natiri Anyu. Kinnaamini wira Nyuwo mwa Yesu mmosaru yoole eente muxerexere mw’ephareya m’oKalileya, aahaawale vathi va Ponsio Pilato, khukhwa, khuhihimuwa, khuwela Wirimu, khwaavaha soovaha athu,

mwa Eroho Yowarya. Kinnaamini wira Eroho Yowarya eri vaava ekelelihaka ohoolo muteko mmosaru Nyuwo mwaavar'anyu okathi waary'anyu muumu. Miyo kinnimukhupaara natiri uwo. Kinnikupali ovonihiwa waka. Kinnimmana natiri wira kinookhalaka mwaha wa Nyuwo ni wiiwelela Sooruma Sanyu, weetta moWaaryani. Nto vano kinnaamini, okhala wira koohinya, wira koovonihiwa ni makhwatta Anyu.

¹¹⁶ Mukilaathi mmaale saana. Vano muupuwele paahi, iwo olapa wanyu, Muluku onimoorwa mwa nyuwo naanaano va. Mwiiimurye Eroho Yowarya, ni waamini, "Kinnaamini wira erett'aka enoovonihiwa. Kinnaamini wira erett'aka yothene yookumihwiwa." Nyuwo naanaano va muri Ohoolo wa Muluku. Khamunwerya wona Eroho yeeyo? Mutthukule mirima sanyu, wa—waamini wanyu. Eroho Yowarya enaavoniha athu naanaano va; mwaaruusi mmosa okilante vaava va, mukina moonoo aka woolopwana. Plataforma yothene enkhala ntoko yoomwaleeliwa ni Owerya wa Kristu ohihimunwe. Eyo eri vamuthukumanoni. Eyo eri mw'athu. Vano, eyo yaari mwaha wa nivekelo nanyu.

¹¹⁷ Vano kinrowa olompa ni ovekela wira xetwani oohoverya akhume mwa nyuwo.

¹¹⁸ O Pwiya Muluku, Mpattuxa a Wirimu ni vathi, mwiiwe mavekelo aka, Pwiya; vowaakuva, Eroho Yowarya ery'ene vaava, athu ehinatthi opweteya.

¹¹⁹ Kinnimpwapwela xetwani. Yesu Kristu oowaakhani oxintta, Owo ooxintta oKalvario; Owo ooxintta okhwa, xetwani, omooroni, ni mahiye, nto khuhihimuwa mmurotoni mwaya, ni mukumi voohimala. Khumani va, Satana, nyuwo mwa yookhala muxinttiwe. Mwaahiye athu ala, mwaahiye evonihiwe, mwa Nsina na Pwiya Yesu Kristu.

¹²⁰ Othene mwaakhenle ovonihiwa wanyu, nvenye mweemele naanaano va. Mwa Nsina na Yesu Kristu, nvenye! Amen. Munvenxerye matata Yoowo, ni mmuttottopele Yoowo. Athu paahi kiniwoon'aka wira khavennyee, ookhala mulopwana mmosa okilante va vakhaterani va iroota, Gane Heelie. Kooosuwela ole okhanle mwah'awe, orina mwaha wa osupiwa.

¹²¹ Enkhala ntoko ekhatera ya iroota ottuli nno. Nrowe noone. Wookhala mwaha mmosa, muhano mmosa orina epantte emosa. Ti siiso? Munnaamini wira ka profeta a Muluku? Miyo ka mmalapo wa nyuwo. Nkinwerya woovonihani. Masi munnaamini wira Muluku onniwerya okileela ole okhanle muxankiho anyu? [Munna muthiyana oniira, "Ayo."—Mol.] Yairaneya vale, yaamookhaliheryani? Nyuwo mwa natiyapeeti. Eyo ekeekhaii. Vano mwaamini, nto murowe owaani mukhale mukumi, vakhaterani va iroota. Ti yeeyo tu murin'anyu wira, omwaamini Pwiya Yesu Kristu, nto khuvonihiwa!

¹²² Nvenxe matata vano, nto—nto mwiire, “Kooxukhuru, Pwiya, mwaha w’okivoniha. Kooxukhuru, Pwiya, mwaha w’okivoniha. Kinnoottotopelani Nyuwo, Pwiya, mwaha w’okivoniha. Muluku t’oreera murima! Muluku ti muulupale! Muluku t’oreerexa! Muluku t’ekeekhai! Muluku ori vaava! Eroho Yowarya eri vaava. Owerya wa Muluku ori vaava. Nto vano kinnaamini ni sothene siri mwa miyo, wira Yesu Kristu, Mwaana a Muluku, onnikivoniha. Amen.”

¹²³ Aakhanle-ene mutthu va onona opwapweliwa mwaha wa etampi, ni munsuwela wira itampi sanyu khasiri vathi v’Ephome, nto naanaano va Ohoolo wa Muluku, Yoowo onsuwela soowuupuwela sanyu, ni Eroho Yowarya ennikileela ela, mwaanitthuna omukupali Yesu okhala Moopoli anyu, munnitthuna wuupuweliwa mmavekeloni? Nvenxe matata, othene ari mu. Muluku ooreeriheni nyuwo, ni nyuwo, ni nyuwo, ni nyuwo, ni nyuwo. Ti yeeyo. Ottuli iwo, nyuwo, ni nno. Vekeekhai. Ottuli nno, Muluku ooreeriheni, mwan’aka. Muluku ooreeriheni iwo. Ni Muluku ooreeriheni. Ti yeeyo.

¹²⁴ Moone, Eroho Yowarya khenavonyeke. Eroho Yowarya yaahimyaka wira...Kaahalela onvaherya muteko Munna Neville, maana ovoniha woomala, masi Etthu emosa khwira, “Awo anniphavela ovonihiwa wa munepa.” Mwaatthunaka omwaakhela Yesu okhala Moopoli anyu, muuramihe muru okathi vakhani paahi. Nrowe nivahererye nivekelo.

¹²⁵ Munna Neville, nkireere olala vammilo, nyuwo nvahererye nivekelo nla, xontte. Vaareera.

¹²⁶ [Munna Neville onoovekela, “Tithi a Wirimu, mwa Nsina na Pwiya Yesu Kristu, Yoowo voovuwa-vo eettale va eriyari ahu ohiy’ula, w’ala anuuramiha muru aya, mwa waamini ohiy’ula, yaaminiki wira Nyuwo munniwerya waavuluxa, soopiili munepa n’erutthu, nwoopole ale anaamini naanaano va mwa waamini w’orukunxa murima. Muluku Oophentiwa, ohiy’ula okhale ohiyu woovirikana w’awo. Mwaavahe vano yoothuna, O Muluku. Ni mwaavahe vano, O Pwiya Yesu, osuwela iwe wootthunaxiwa wa itampi sooleveleliwa. Mmoopole khula mmosa, O Muluku, yuuramme muru aya vale, avekenle ocaliwa mwa mavekelo. Ni wira awo, okhuma okathi ula mpakha ohoolo, ehele mmurimani mwaya okhala mwaha wa Yoole aakhwenle. Mwa Nsina na Yesu ni mwaha wa Yesu ninnivekela. Amen, ni amen. Attotopeliwe Apwiya!”—Mol.]



ETHOONYERYO YA MESIYA EMK59-0329E
(The Sign Of The Messiah)

ETTHERANELO YA MUTTHAKA WA PAASIKHA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ya Paasikha ohiyu, mahiku yeettaka 29 mweeri wa Março, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org